

**Oqaatsuni oqaluffiliornissaq siunertaralugu sanaartornissamut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Doris J. Jensen, Siumut)

**Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

**Siullermeerneqarnera**

Oqaatsuni oqaluffiliornissaq siunertaralugu sanaartornissamut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuummut matumunnga Naalakkersuisut sinnerlugit qujavunga.

Oqaatsuni naalagiartartut pitsaasumik atugaqarnissaannik kissaateqarnermut Naalakkersuisut paasinnilluarpuq. Illuli siunnersuuteqartumit eqqaaneqartoq oqaluffittut nalunaarsugaannginnera oqaluffittulli atuarfiusartutut nalunaarsugaasimanera naalakkersuisunit maluginiarparput, illulu pineqartoq Avannaata Kommuniata akisussaaffiisa ataaniittoq aamma maluginiarparput.

Oqaluffiit atuarfiusartut Naalakkersuisut aserfallatsaaliugassaannut imaluunniit iluarsartugassaannut illunut ilaangillat, aqqissorneqarnissaannulli kusassarneqarnissaannulli siunnersuuteqartussaataasut tassaallutik ilagiit sinnissaat.

Ilageeqarneq pillugu Inatsisartut inatsisaat nr. 9, 19. maj 2010-meersumi kingullermillu Inatsisartut inatsisaat nr. 27, 3. december 2018-imeersukkut allangortinneqarsimasumi § 21, imm. 1-imi (Ilagiit pillugit inatsimmi) tamanna aalajangersarneqarpoq. Tassani aalajangersarneqarpoq ilagiit sinniisaat oqaluffinnik toqusullu inaannik sanaartornissamut aqqissorneqarnissaannut kusassarneqarnissaannut, kiisalu init naalagiartarfittut atorneqartut (atuarfiit naalagiartarfiutigisut) aqqissorneqarnissaannut kusassarneqarnissaannulli siunnersuutinik provstimut saqqummiussisassasut. Imm. 2-mi, ilagiit sinniisaannit siunnersuutit saqqummiunneqartut, taakku piumasaqarnerisigut Biskoppimut Naalakkersuisunullu saqqummiunneqassasut aalajangersarneqarpoq.

Taamaattumik siunnersuuteqartup siunnersuutaa Naalakkersuisut imatut paasivaat; ulluinnarni atuarfittut atorneqanngitsumik immikkut oqaluffiliortoqarnissaannik kissaateqartoqartoq.

Provstininngaaniit, biskoppiminngaaniit Naalakkersuisuniillu, oqaluffiit illutaasa ataatsimut qanoq pitsaassuseqarnerata paasineqartarnissaata qulakkeerneqarnissaa aammalu sanaartornissamut, iluarsartuussinissamut, allanullu tunngasut kissaataasut, ilagiit pillugit inatsimmi aalajangersarneqarsimasut, taassuma iluani akisussaaffiit pillugit

agguarneqarsimaneranut tunngasut, suleriaatsimullu aamma tunngasut malinneqarnissaat pingaaruteqarpoq.

Ilagiit pillugit inatsimmi § 20, imm. 1-imi, palasi atuagarsuarnik allattuusoq palaseqarfiup oqaluffiini, tassungalu atasunik toqusut inaannik nakkutilliissasoq, nakkutilliinerlu sumiiffinni ilagiit sinniisaat peqatigalugit ingerlanneqassasoq aalajangersarneqarpoq.

Aammattaaq palasi, atuagarsuarnik allattuisuusoq, palaseqarfimmi pineqartumi nakkutilliisimanermut nalunaarusiamik, provstimut ukiukkaartumik nassiussisassasoq, oqaluffiillu illutaasa illersorneqarsinnaasumik pitsaassuseqarnissaannut provsti isumaginnissasoq aalajangersarneqarpoq.

Oqaluffiit illutaasa pitsaassusiinik kiisalu suliassaqarfimmi kissaatinik ataatsimoortumik tamakkiisumik paasisaqarnissamut aamma pingaarnersiunerlik pisariaqartunik isumaginninnissamut nakkutilliinerlik nalunaarusiat atorineqassapput. Ilagiit pillugit inatsimmi § 6, imm. 1 malillugu Ilagiinni qitiusumik aqutsineq allaffissornerlu biskopip akisussaaffigai.

Oqaluffiit illutaasa sanaartorneqarnissaannut, iluarsartuunneqarnissaannullu siunnersuutaasimasunut tunngasut ataqatigiissarneqarnissaat, naalakkersuisunullu nassiunneqarnissaat biskopip akisussaaffigai, taamaaliornikkut, iluarsaassinermut sanaartormullu aningaasaliissutissanut atatillugu Naalakkersuisut pingaarnersiunerlik isummersuutitut atorineqarsinnaaqullugit.

Oqaatsuni oqaluffittut ini atorineqartoq Avannaata kommunianiippoq. Taassuma saniatigut nunaqarfimmi nutaamik oqaluffiortoqarnissaa pillugu kissateqarsimaneranik, Naalakkersuisut siusinnerusukkut nalunaarfigineqarnikuunngilagut. Tamakku pillugit suleriaatsinik eqqaaneqartunik malinnittoqarnissaa Naalakkersuisut kissaatigaat, taamaalillunilu Naalakkersuisut akuliutinnginnerini Ilagiit iluanni oqallisigineqaaqarlutik, tassa imaappoq, qitiusumik oqartussaasut tassaasut ilaagit, taakku pisariaqartutigit pingaarnersiunerlik isumaginninnissaa pingaaruteqartoq uani avaqunneqarsinnaanngitsoq Naalakkersuisut pingaartikkaat oqaatigineqassaaq.

Tamatuma saniatigut ilisimatitsissutigineqarsinnaavoq Avannaata Kommunia kiisalu Provsteqarfik Avannaa nalunaarsimammata illu annikitsumik iluarsaassiffigineqarsimasoq maannakkullu atuarfimmit Ilagiinnillu atorineqaaqqilerluni.

Taamaattumillu Naalakkersuisut tulliuuttoq allannguutissatut siunnersuut saqqummiuppaat: *Inatsisartut aalajangiiffigisassaattut siunnersuut Naalakkersuisut Ilagiit suleqatigalugit immikkoortumut pilersaarummik suliaraqullugit peqquneqarnissaannik, tassanilu nutaanik sanaartornissamut iluarsaanissamullu pisariaqartitsinerit Ilagiit suliassaqarfianniittut qulaajaavigineqassasut.*

Naalakkersuisut nalilerpaat allannguutissatut siunnersuut aningaasaqarnikkut kinguneqassasoq ukiumi ilivitsumi AC-mik atorfiup affaata nalingatut annertussusilimmik.